

## **Ukanikorongi u Ire Ubana a Asu u Aza a Korintiya**

### *Ukukpa u kadyanshi*

Bulus korongu ta ukanikorongi u na vi ubana a asu u atoni a da a'ari a Korintiya an aza roku a le pini de a ka sapulusa Bulus. U suku ta kabangi ka ne Taitu ba u yanka ama yi kadyanshi a kaci ka ili i'ya i'ari i mayun. An Taitu gonoi u tonuko ta Bulus an ama ushani a wushuki n i'ya u danai, shegai aza roku a da pini a buwai bawu a wushuki. A ukanikorongi u na vi, Bulus cikpa ta abangi a ne, kpmam u yain kadyanshi ka aza da a 'yuwan yi vi.

Bulus tofugbusuko ta ama yi tyoku da wari wa ciga u yain, kpmam n i'ya i kangu yi u yain nala vi. A kapala kpmam, u yain kadyanshi a kaci ka ugbashika Kashila. U yan ta kadyanshi tyoku da Atoni a ka bangamgbana. A makorishi u wenike ta kaci ka ne an wari kasuki ka maci ka Kawauwi.

Tagarada u na wa wenike tsu ta tyoku da Atoni a ka yan manyan gogo-na, n tyoku da a ka banga nkoshi ma Atoni n awenishiki a da a ka yanka Kawauwi manyan. U yan ta kadyanshi hal gai tyoku da a ka naka ikebe n ili i maci adama a manyan ma Kashila. U wenike tsu ta an makoshi ma mayun ma tsu yan manyan adama a ili i'ya wa tsara wa, shegai adama a ili i'ya ama a ka tsara. U dana ta, a'ayin a da baci a yain ukuna bawu pini ucira n uciga u Yesu, ukuna u nala u woko de u gbani. Shegai a'ayin a da baci a yain ukuna n ucira n uciga u Yesu, ukuna u nala wa zuwa ta Kashila

ka pana kayanyan kpm a tsarā ucira u mayun a likimba.

*Ili i'ya i'ari a tagarada u na vi*

Bulus cikpai Kashilā (1:1-11)

Manyan ma kasuki ubana a asu u ama a Kashilā  
(1:12–2:17)

Adooki a asuvu a uciga u Kawauwi (3:1–7:16)

Kune ubana a asu u aza a unambi (8:1–9:15)

Bulus kasuki ka mayun ka (10:1–13:10)

Idyani i makorishi (13:11-13)

*Idyani i Bulus*

<sup>1</sup> Mpa Bulus, Kashilā ka ka cigai ka dangasa mu n woko kasuki ka Yesu Kirisiti Kawauwi. Timoti wā tā pini kabolo nā mpa a'ayin a da n korongi ukanikorongi u na vi.

Kuwa ku Atoni ku Kashilā ka kari a ilyuci i Korintiya ka ma koronku, n gbā aza da a'ari ama a Kashilā a kapashi ka Akataya.

<sup>2</sup> Asaka Kashilā Tata u tsunu n Yesu Asheku Kawauwi a naka da ukuna u shinga nā ndishi n shinga.

*Bulus cikpai Kashilā*

<sup>3</sup> Cikpai Kashilā eyi uza da wari Tata u Asheku a tsunu Yesu Kawauwi! Kashilā Tata aya uza da wari n iyali kpm n unaka ndishi n katakasuvu.

<sup>4</sup> U tsu naka tā ndishi n katakasuvu a'ayin a da baci tsari a asuvu a kadambula, tsarā tsu naka aza roku ndishi n katakasuvu. A'ayin a da baci aza roku a'ari a asuvu a kadambula, tsa fuda tā tsa naka le icun i ndishi n katakasuvu n nala n da Kashilā ka naka tsu vi. <sup>5</sup> Mayun da wari an tsa pana ikyamba cika adama a Kawauwi. Mayun da kpm

tsu tsu tsarā ndishi n katakasuvu cika adama a Kawauwi. <sup>6</sup> Tsu pana baci ikyamba, tsa zuwa tā uma u da Kashilā ka naka da ndishi m atakasuvu n iwauwi adama a upana u ikyamba u nala vi. A'ayin a da baci dem Kashilā ka naka tsu ndishi n katakasuvu, tsarā tsu gbamatangu da da. Kpam i fuda i kawunku n ahankuri a upana u ikyamba vi. <sup>7</sup> Uzuwa u uma u tsunu ubana ara de wa tā n ucira, kpaci tsu reve tā i pana baci ikyamba tyoku da atsu tsu panai, ya wusha tā ndishi n katakasuvu tyoku da atsu tsu wushai.

<sup>8</sup> Ama a va, tsa ciga tā i reve tyoku da tsu panai ikyamba a uyamba u Asiya. A zuwuka tsu tā ukuna u da u lai ucira u tsunu, hal tsu takpai uma gbam tsa yan uma kpam wa. <sup>9</sup> Mayun da, tsu zuwa tā tsa kuwa. Shegai ukuna u nala u zuwa tsu tā tsu gitā uwushuku n Kashilā, shegai kaci ka tsunu wa, kpaci aya u tsu 'yangasa akushe. <sup>10</sup> Kashilā ka wauwa tsu tā a'ayin a da tsu yain evu n ukuwa vi, tsu reve tā kpam wa lya kapala n uwauwusa tsu. <sup>11</sup> Wa wauwa tsu tā kpaci eda ya bangasa tsu tā an ya yansa ka tsu kavasuu. Adama a nala, Kashilā ka wushuku tā kavasuu ka de. Wa zuwuka tsu tā unā u shinga, kpam ama ushani a ka cikpa yi tā adama a ili i'ya u yanka tsu.

*Bulus asakai ve nwalu ma ukyawunsa u ne*

<sup>12</sup> Tsu ciba baci n ili i'ya tsu yain, tsu tsu dana tā tsu yan tā mazanga an bawu tsu yain ukuna u gbani. Kain dem tsu tsu rongo tā mai, kpam tsu tsu sokonku da ko ili wa. Ukuna u shinga u Kashilā u da u zuwai uyan ili i nala yi gba, ugboji u likimba u da wa. Tsu rongo tā mai ko nte wa, hal gai u kana

baci n aḍā. <sup>13-14</sup> An tsu koronku ḍā vi, tsu yan tā kadyanshi n aḍā karara, tsu sokonku ḍā ko akani a te wa. Adama a nala, n zuwa tā uma ya reve tā gbā i'ya tsu korongi. I tsā tā i revei ili i roku a ili i'ya tsa tonon, shegai tsu zuwa tā uma ubana kapala ya reve tā i'ya mai mai, tsara kain ka Yesu Asheku a tsunu ka yan baci, ya yan tā mazanga adama a tsunu, aṣu kpmam tsu yain mazanga adama a de.

<sup>15</sup> N reve tā ukuna u na vi mai, ḍa gai i zuwai mari n fobusoi ma tuwa n kyawan ḍa ve n kagita ki, nala Kashila ka zuwuka ḍa una u shinga kpaci mari ma tuwa tā ara de kure. <sup>16</sup> Mari ma ciga tā n bātsa n kyawan ḍa a'ayin a ḍa n wurai ubana a uyamba u Masidaniya n a'ayin a ḍa kpmam ma wura ugonon. Aku i'ari i banga mu kpmam i soku mu a nwalu n va ubana a kaḅon ka Yahuda. <sup>17</sup> N reve tā ya wecike tā ili i'ya i bishinka mu uyan i'ya n fobusoi vi. Kadyanshi ka uvurusā a'ene ka ma yanka ḍa wa. Gogo-na n woko la vi de tyoku u ama a likimba aza ḍa a ka dana ukuna aku a gonon a kpaḍa u ḍa ushadangu?

<sup>18</sup> I reve tā gai Kashila uza ḍa i wushuku n eyi ḍa, nala dem u gan tā i reve an tsu tsu dana “Eye” aku tsu gonon tsu dana “A'a” kute wa. <sup>19</sup> Kpaci Yesu Maku ma Kashila u tsu dana “Eye” aku u gonon u dana “A'a” kute wa, shegai u tsu rongon tā n katakasuvu ka te. Aya uza ḍa mpa n Sila n Timoti tsu yanka ḍa kadyanshi a kaci ka ne. <sup>20</sup> Kpaci aya u shadangi gbā kazuwamgbani ka Kashila. Adama a nala a ḍa tsu tsu dana “Ami” tsu naka baci Kashila tsupige a asuvu a kala ka Kawauwi. <sup>21</sup> Ciḅai, Kashila ka ka tsu zuwa ḍa hal n aṣu dem tsu yain ucira a asu u Yesu. Kashila ki aya dem

u dangasa tsu. <sup>22</sup> U kaara tsu ta kugyan tsara u wenike an atsu ama a ne a da koshi. U zuwuka tsu ta dem Kulu ku ne a asuvu a atakasuvu a tsunu tyoku u uzuwamgbana tsara u wenike tsu an ili i roku i'ari a utuwa.

<sup>23</sup> Kaƙan ka baci ma yanka da an n danai n 'yuwan ugono a Korintiya vi adama a da bawu ma ciga n yan da mavura, asaka Kashila ka yan mu mavura. <sup>24</sup> Ili i'ya ya wushuku n i'ya, i'ya tsa tonusuko da wa. Tsu reve ta i'a ta n upityanangu u ucira, adama a nala a da i'ari n ucira. Tsa ciga ta tsu yain manyan kabolo n ada tsara i shadangu n mazanga.

## 2

<sup>1</sup> N tonuko ta kaci ka va, "Ma doku ma tuwa ara de wa, kpaci an n tuwai ara de caupa vi n zuwa ta gba de unamgbukatsuma." <sup>2</sup> Shegai ma zuwa da baci unamgbukatsuma, ya wa zuwa mu n pana kayanyan? Eda koshi, kpam eda aza da n zuwai unamgbukatsuma. <sup>3</sup> I'ya gai i zuwai n koronku da nala a ukanikorongi u da n sukunku da vi. Ma ciga n kyawan da wa, kpaci ugawunsa n ada wa zuwa mu ta ukpada u upana u kayanyan. Kpam eda ama da u gain i zuwa mu upana u kayanyan. Ili i'ya i zuwai ma ciga n pana kayanyan i'ya tsara eda dem i pana kayanyan. <sup>4</sup> A'ayin a da n koronku da caupa vi, ma ta n kadambula n ukpada u upana u kayanyan a asuvu a katakasuvu ka va hal n koronku da n meshi a a'eshi a va cika. N koronku da tsara n zuwa da unamgbukatsuma wa, shegai koronku da n koronku da tsara i reve an ma ciga da cika.

### *Cimbusukai atoku unyushi u cingi*

<sup>5</sup> Uza roku a asuvu a de u zuwa mu baci unamgbukatsuma, mpa u zuwai utyoku u va wa. Gba de da u zuwai unamgbukatsuma, kpam ya dem wa ta n tyoku da wa pana u da. Ma ciga n dansa cika wa. <sup>6</sup> Ubolomgbono u kaci u da aza roku a de ushani a yain a yan yi mavura ma ma gain a naka yi vi, ma rawa ta. <sup>7</sup> Shegai gogo-na u gan ta i cimbusuka yi i naka yi ndishi n katakasuvu tsara kotsu i zuwa yi u rongo n unamgbukatsuma hal upityanangu u ne u rukpa wa. <sup>8</sup> Ma folo da, wenike ni an ya ciga yi. <sup>9</sup> Koronku da ma koronku da tsara n kondo da, kpam n wene ko ya pana uwenishike u va. <sup>10</sup> I cimbusuka baci vuma nala vi, mpa dem n cimbusuka yi ta. N cimbusuka yi baci (an baci unyushi wari pini), yan da n yain nala tsara n yanka da ukuna u shinga a ucira u Kawauwi. <sup>11</sup> Tsara Kanangasi\* ka lyai kelime n u la tsu ugboji wa, kpaci tsu reve ta afofi a Kanangasi utuwa ara tsunu.

### *Kubari ku Bulus a Taruwasa*

<sup>12</sup> An n rawai a Taruwasa tsara n yain kubari ku Kadyanshi ka Shinga ka Kawauwi, n cina ta cina Asheku a fobuso de ure adama a manyan mi. <sup>13</sup> Shegai n dambula ta cika, kpaci n wene utoku u tsunu Taitu wa. Pini nala, n tonukoi aza da a'ari pini vi, "U yan tsu ben." Aku n lazai ubana a Masidaniya.

### *Ulya u kaci adama a Kawauwi*

---

\* **2:11** Kanangasi; wata, "Shetan" kala ka dem ka Kalapansi.

14 Tsu cikpa t̄a Kashil̄a cika! Aya u zuwa tsu tsu woko agbashi a ne kpm̄ u tonoi n̄ ātsu a kapala adama a ulya u kaci u Kawauwi. Kashil̄a ka ɓ̄aṅga tsu t̄a dem tsu tamburuka ureve u Kawauwi ko nte wa tyoku u ili i magul̄ani.† 15 Uma u tsunu w̄a t̄a tyoku u magul̄ani ma Kawauwi ka nāka Kashil̄a, ma kpm̄ ma tambura a asu u ama ɗa Kashil̄a ka wauwusa hal n̄ ama ɗa a ka kuwusa. 16 A asu u aza ɗa a ka kuwusa, magul̄ani mi ma woko le ɗe kāwan ka ukpa. Shegai a asu u aza ɗa a'ari n̄ uma, magul̄ani mi ma woko le ɗe magul̄ani ma uma. Ya wa fuda wa canga araji a ukuna u nala vi? 17 Tsa tyoku u ama ɗa a tsu yan kuɓari ku kadyanshi ka Kashil̄a tsara a tsara ikebe wa. Nala tsari wa. Shegai umatsi u ɗa tsari u uwoko atsumate a Kashil̄a, kpm̄ a asuvu a ucira u Kawauwi tsu tsu dansa t̄a akani yi a kapala ka Kashil̄a.

### 3

#### *Kazuwamgbani ka savu ka Kashil̄a*

1 Gogo-na gita ɗa tsa gita ucikpala kaci ka tsunu? Ama roku a rawa t̄a n̄ ikanikorongi i icikpali ko kpm̄ a zuwa ɗa i koronku le ikanikorongi i icikpali yi. U gan tsu yain n̄ ikanikorongi nala? 2 Shegai eɗa ukanikorongi u tsunu, kpm̄ i'a t̄a a asuvu a atakasuvu a tsunu tsara ya dem u yain kaneshi u reve kpm̄ i'ya u yain kaneshi vi. 3 I wenike t̄a a kateshe an eɗa ikanikorongi i'ya Kawauwi ka korongi aku ātsu tsu bankai i'ya. Kulu Keri ku Kashil̄a Uza u Uma ku korongu ɗa t̄a a asuvu a atakasuvu a tsunu, shegai a iwaraka ko agbagala a ɗa a yain n̄ atali wa.

<sup>4</sup> Tsa fudā tā tsa dana nala adama a ucira u upityanangu u tsunu a kapala ka Kashilā adama a Kawauwi. <sup>5</sup> Dana dā tsu danai tsa fudā tsa yan manyan ma nala mi n kaci ka tsunu wa. Kashilā ka ka zuwai tsu fudai tsu yain gbā i'ya tsu yain vi. <sup>6</sup> U zuwa tsu tā tsu fudā tsu woko agbashi a kazuwamgbani ka savu ka ne ka ka wutai a asu u Kulu Keri. Kazuwamgbani ka savu ki Mele ma a korongi wa, kpaci Mele ma a korongi ma tsu tuko tā ukpā, shegai Kulu ku tsu tuko tā uma.

<sup>7</sup> Mele ma cau a atali a dā a tsu korongu ma, kpam a tsu wene tā tsupige tsu Kashilā a a'ayin a nala yi. Aza a Isara'ila a fudā a ɓarākpā n a wundi upetiwa'eshi u Musa wa, kpaci wa laḏa tā cika, ko an u wokoi uladā vi u ɓarākpā wa. Adama a nala, Mele ma ma wokoi manyan ma ne utuko u ukpā u dā, kpam mārī n tsupige nala, <sup>8</sup> tsupige tsu manyan ma Kulu Keri tsu la tā tsupige tsu Mele. Ko nala wa? <sup>9</sup> Manyan ma ma tsu tuko ama ukidāga u ugana n mavura mā baci n tsupige, manyan ma ma tsu zuwa ama a woko ama a maci a kapala ka Kashilā ma yan tā n tsupige tsa tsa la nala vi. <sup>10</sup> Mayun dā an tsupige tsu kazuwamgbani ka cau tsu woko de ili i gbani, kpaci katyashi ka tsupige tsu savu ka la tā ka cau. <sup>11</sup> Mele mā tā n tsupige tsa tsu kporoi. Shegai tsupige tsu kazuwamgbani ka savu tsu la tā ucira, kpaci tsa kporo wa.

<sup>12</sup> Tsa dansa tā bawu uwonvo, kpaci adama a nala a dā tsārī n uzuwa u uma. <sup>13</sup> Tsā tyoku u Musa wa. Upetiwa'eshi ne u laḏa tā, shegai u pala tā u dā tsārā u zuwa aza a Isara'ila a lyai kelime n uwene katyashi ki n ka kpori wa. <sup>14</sup> Ama yi a ryagbaja tā, kpam ili i roku i tsu kangu le tā uwene



ukuna u mayun a'ayin a ɗa baci a yain kañeshi u Mele. Kawauwi ka koshi ka fuda ka takpa le ili i'ya i kangu le uwene vi. <sup>15</sup> Ko n gogo-na, a yan baci kañeshi u Mele ma Musa, ili i'ya pini i tsu kangu le atakasuvu. <sup>16</sup> Shegai a'ayin a ɗa baci dem uza kpatalai ubana a asu u Asheku, she u takpa yi ili i'ya i kangu yi vi. <sup>17</sup> Asheku a nala yi aya Kulu. Kpam asu ɗa baci dem Kulu ku Magono ma Zuba kari, ku tsu naka ta utsara u kaci. <sup>18</sup> Adama a nala ipetiya'eshi i tsunu i'a kpam upali wa, tsara tsu wenike tsupige tsu Magono ma Zuba. Kpam Kulu ku Magono ma Zuba ka yan baci manyan a asuvu a tsunu, tsa woko ta tyoku u ne aku tsu wenike tsupige tsu ne cika.

## 4

### *Kuzuwate ku ucanga a mgbodo n cin*

<sup>1</sup> Kashila n upana u iyali u ne, u naka tsu ta manyan ma na mi tsara tsu yain. Ili i'ya i zuwai bawu tsa wowo i'ya la vi. <sup>2</sup> Tsu 'yuwan ta uyan ili i uwono ko kpam i'ya i'ari usokongi. Tsu tsu yinsa ko uza wa, kpam tsu tsu savaɗa uwenishike u Kashila wa. Ukuna u mayun u ɗa koshi tsu tsu dansa a kapala ka Kashila, tsara ama a wushuku an tsari ama a maci. <sup>3</sup> Kadyanshi ka Shinga ka tsa yansa kuɓari ka baci ukimbi, a asu u aza ɗa a'ari a ure u ukpa ɗa kari ukimbi. <sup>4</sup> Kanangasi;\* wata, uza cingi uza ɗa wa lya tsugono tsu likimba u na u rumbanasa ta atakasuvu a le, pini nala, a wushuku n akani a ɗa tsa yansa kuɓari a kaci ka tsupige tsu Kawauwi wa. A ka wene katyashi

\* **4:4** Kanangasi; wata, “Shetan” kala ka dem ka Kalapansi.

ka pige ka ka wakana ara le wa, kɓam a reve an Kawauwi ka rotsoi Kashilā wa. <sup>5</sup> A'ayin a ɗa tsa kyawunsa n tsu yanyi kuɓari ku Kadyanshi ka Shinga ka Kashilā ki, kuɓari ku kaci ka tsunu ka tsa yansa wa, shegai ku Yesu Kawauwi an wari Asheku. Atsu agbashi a ɗe a ɗa adama a ili i'ya Yesu yanka tsu. <sup>6</sup> Kashilā ka ka danai, “Asaka katyashi ka wakana a asuvu a karimbi!” U zuwa tsu ta tsu reve an katyashi ka na ki katyashi ka tsupige tsu Kashilā ka, ka tsu tsu wene a up-etiwa'eshi u Yesu Kawauwi.

<sup>7</sup> Kuzuwate ku ucanga ku na ki a asu u Kashilā ɗa tsu tsarai ka, shegai tsari ta tyoku u mgbodo n cin a asu u ɗa kuzuwate ku ucanga ki kari. Nala u wenike ta an ucira u pige vi a asu u Kashilā ɗa u wutai, shegai ara tsunu wa. <sup>8</sup> A uka tsu a asuvu a awuya cika, shegai a fuda a minjara tsu wa. Ko tsu reve baci kɓam ili i'ya tsa yan wa, tsu tsu bula uzuwusa uma an ili i shinga i roku ya gita wa. <sup>9</sup> A zuwa tsu ta tsu panai ikyamba cika, shegai Kashilā ka asaka tsu wa. A tsu gbashangu tsu ta a iyamba, shegai gba n nala a wacinsa tsu wa. <sup>10</sup> A'ayin a ɗa baci tsa pana ikyamba nala, ikyamba i tsunu i tsu wenike ta tyoku ɗa Yesu panai ikyamba a'ayin a ɗa u kuwai vi. Pini nala, ama a ka wene ta uma u Yesu a asuvu a ikyamba i tsunu. <sup>11</sup> Nala wari, kain dem tsu tsu reve ta gaawan a ka wuna tsu ta adama a ɗa tsa gbashika Yesu. Pini nala, ama a ka wene ta uma u Yesu a asuvu a ikyamba i tsunu i'ya ya kuwa. <sup>12</sup> Tsu wushuku ta tsu modono n ukpa, tsara eda i tsara uma.

<sup>13</sup> A korongu ta a Tagarada u Kashilā, “Dansa ɗa ma dansa an u wokoi n wushuki.” Uwushuku u

te u da tsari n u da, kpam dansa da tsa dansa an u wokoi tsu wushuki. <sup>14</sup> Kashila ka 'yangasa ta Yesu Asheku a asuvu a ukpa. Tsu reve ta kpam an Kashila ka tuwa ka 'yangasa tsu n Yesu. Kashila ka bidya tsu ta kaɓolo n ada kpam tsu shamgba a kapala ka ne. <sup>15</sup> Gba ukuna u na vi adama a ukuna u shinga u de u da. Tyoku da ama ushani a'ari ulya kelime n uwusha ukuna u shinga u Kashila, nala dem a'ari ulya kelime n ucikpa Kashila, Kashila kpam kari a udoku uwusha tsupige cika.

### *Upityanangu a asu u Asheku*

<sup>16</sup> Ili i'ya gai i zuwai bawu tsa bulu uzuwa uma i'ya gai la vi. Ko an u wokoi ikyamba i tsunu ya kuwusa, kain dem kulu ku tsunu ku tsu tsara ta ucira u savu. <sup>17</sup> Upana u ikyamba u da tsa pana gogo-na wa gan wa, kpam wa barakpa wa. Shegai wa banga tsu ta tsu tsara tsupige tsa tsu lai upana u ikyamba vi cika, kpam tsupige tsi tsa yan n utyoku wa. <sup>18</sup> Tsu zuwa a'eshi a tsunu a ili i'ya tsa wene wa, shegai a ili i'ya bawu tsa wene. Ili i'ya tsa wene vi ya barakpa wa, shegai ili i'ya bawu tsa wene vi ya yan n utyoku wa.

## 5

<sup>1</sup> Tsu reve ta a wasa baci katani ka tsa rongo na vi; wata, tsu kuwa baci tsu asakai ikyamba i na yi, Kashila ka fobusuko tsu ta kuwa ka tsa rongo a zuba. Asu u da eyi fobusoi n kaci ka ne kpam bawu wa kotso. <sup>2</sup> Tsu wowo de n ikyamba i'ya tsari n i'ya gogo-na, adama a nala tsu matsa de a uka tsu ikyamba i savu a zuba tyoku u aminya a savu. <sup>3</sup> A'ayin a nala tsa rongo kpam kataba wa, kpaci

t̄sa uka t̄a ikyamba i savu a zuba. <sup>4</sup> An tsa rongo n ikyamba i na yi t̄sa t̄a ushadangi n kadambula k̄pam tsa pana t̄a ikyamba. Shegai uwowi u tsunu u zuwa tsu tsu cigi ukp̄a aku tsu as̄aka ikyamba i na yi wa. Tsa ciga t̄a tsu as̄aka ikyamba i cau yi, kpaci tsa wusha t̄a ikyamba i'ya bawu ya kuwa. <sup>5</sup> Kashil̄a ka n kaci ka ne u fobuso tsu adama a nala yi, kpam u nak̄a tsu Kulu Keri tsar̄a ku woko tsu uzuwamgbana u da wa wenike an uma u savu u na vi mayun da.

<sup>6</sup> Adama a nala kain dem tsu rongo n atakasuvu a ucira. Tsu reve t̄a a'ayin a da baci tsari n uma a ikyamba i na yi, t̄sa a kuwa ku te n Asheku wa. <sup>7</sup> Tsa tonon t̄a ili i'ya tsu wushuki n i'ya, shegai tsu tonon ili i'ya tsu wenei wa. <sup>8</sup> Adama a nala a da n danai t̄sa t̄a n atakasuvu a ucira. Tsu la t̄a uciga tsu as̄aka ikyamba i na yi tsar̄a tsu bana a kuwa a asu u Asheku tsu rongo de. <sup>9</sup> T̄sa baci n uma pini na a ikyamba i na yi, ko kpam t̄sa baci bawu uma, uciga u tsunu tsu yanka yi ili i'ya wa pana kayanyan u la t̄a ili i'ya i buwai gba. <sup>10</sup> Ili i'ya i zuwai i'ya, kain ka roku gba tsunu tsa shamgba t̄a a kapala ka Kawauwi kpam u yanka tsu afada. Ya dem a asuvu a tsunu wa wusha t̄a katsupi ka ili i'ya u yain a'ayin a da wari n uma a ikyamba i na yi, ko i'a baci mai ko icingi.

### *Utuko u ama a asu u Kashil̄a*

<sup>11</sup> Adama a da tsu revei an tsa pana uwonvo u Asheku da i zuwai tsu matsai tsar̄a ama a kpatala a gono a asu u ne. Kashil̄a ka reve t̄a tyoku da tsari mayun, tsa ciga da t̄a i reve tyoku da tsari.

<sup>12</sup> Tsa ciga tsu doku tsu wenike da aradi a kaci ka

ili i'ya tsari wa, shegai tonuko da tsa tonuko da ili i'ya tsari tsara i yain mazanga adama a tsunu. Pini nala, da ya tsara ili i'ya ya dana a kaci ka aza da a tsu wenike aradi a kaci ka ili i'ya ama roku a tsu dansa a kaci ka le, shegai a'ala ama a maci a kapala ka Kashila wa. <sup>13</sup> U woko baci yavu ijan i'ya tsa suma, tsara u tuko Kashila tsupige da. U woko baci kpam yavu tsa n ugboji u tsunu, nala kpam tsara tsu banga da da.

<sup>14</sup> I'ya baci dem tsa yan, yan da tsa yan i'ya kpaci uciga u Kawauwi u da wa tono n atsu. Tsu wushuku ta an uza roku; wata, Kawauwi ka kuwai adama a ko ya wa, adama a nala tsu wushuku ta an gba tsunu tsu kuwai. <sup>15</sup> U kuwa ta tsara u wauwa ko ya wa, tsara aza da a wushai uma u savu adama a ne, a rongo kpam uma u da ele a ka pana kayanyan koshi wa. Shegai a rongo uma u da Kawauwi ka pana kayanyan, uza da kuwai kpam a 'yangasa yi tsara u wauwa le.

<sup>16</sup> Adama a nala a da tsu asakai ubidisa atoku tyoku da likimba u yawunsa a kaci ka le. Caupa, tsu tsu yawunsa ta a kaci ka Kawauwi tyoku da likimba u tsu yan, shegai gogo-na nala wari wa. <sup>17</sup> Uza da baci bolomgbonoi kaci n Kawauwi, Kashila ka gonuko yi ta vuma u savu. Ukuna u cau a kaci ka ne u kotso de, kpam i puwan de. Ko ndya wa i ne Kashila ka gonuko i'ya de i savu. <sup>18</sup> Kashila ka ka yain ili i na yi gba, u tuko tsu evu n eyi adama a ili i'ya Kawauwi ka yain. U naka tsu manyan ma utuko ama evu n eyi. <sup>19</sup> Akani a tsunu yi a da, Kashila ka tukuso ta ama evu n eyi a akere a Kawauwi. Kashila ka tsu cibusa unyushi u cingi u le wa. U naka tsu ta kpam akani a ndishi n shinga

a na yi. <sup>20</sup> Kashilā ka zuwa tsu tā tsu woko aza a manyan a unā u K̄awauwi, kpm̄ u woko tā yavu folo ḍa wa folo ḍa i pana kadyanshi ka tsa tono. Adama a K̄awauwi a ḍa tsa dansa, kpm̄ tsa folo ḍa tā i asakā Kashilā ka tuko ḍa evu n eyi. <sup>21</sup> K̄awauwi ka yan unyushi u cingi wa ko kenu! Shegai Kashilā ka gonuko yi uza u unyushi u cingi adama a tsunu, tsarā K̄awauwi ka gonuko tsu ama a maci a asu u Kashilā.

## 6

<sup>1</sup> Tsu yan tā manyan kaḅolo n Kashilā, kpm̄ tsa folo ḍa tā kotsu i wushi ukuna u shinga u ne gbani wa. <sup>2</sup> U dana tā a Tagarāda u Kashilā, “A'ayin a rawa baci a ḍa ma wenike ḍa asuvayali, ma pana tā kavasus ka ḍe.

Kain ka iwauwi n ḅāngā ḍa tā.” ◇

Mayun ḍa, Kashilā ka tā ufoḅusi u ḅāngā ḍa gogo-na. Ara kain ka iwauwi ka.

### *Upana u ikyamba u Bulus*

<sup>3</sup> Tsa ciga aza roku a 'yuwan manyan mi wa, adama a nala tsa ciga i'ya tsa yan i zuwa aza roku a rukpā wa. <sup>4</sup> I'ya baci dem tsa yan, tsu tsu ciga tā tsu wenike aṡsu agbashi a mayun a Kashilā a ḍa. Tsu kawunku tā gbā upana u ikyamba n ahankuri. <sup>5</sup> A lapa tsu tā. A zuwusa tsu tā a kuwa ku a'ali. Kakumā ka ama ka pana tsu tā upan hal a 'yangasasai atakasuvu a ama. Tsu yan tā manyan hal tsu ḍukpai. Roku tsu tsu lavuta wa. Roku kpm̄ tsa tsarā ilikulya wa. <sup>6</sup> Tsu wenike tā kaci ka tsunu aṡsu agbashi a Kashilā a ḍa, kpaci tsu

---

◇ 6:2 Isha. 49:8.

nangasa kaci ka tsunu n tsicingi wa, tsā tā n ureve u ḁa Kashilā ka tsu ṅakā. Tsu tsu yan tsali wa. Tsu tsu yansa ka tā ama ukuna u shinga. Tsā tā n ucira u Kulu Keri, kpam tsa ciga tā ama mayun mayun. <sup>7</sup> Kadyanshi ka mayun ka tsa yansa kuḁari, kpam Kashilā ka ka ṅakā tsu ucira vi. Tsā tā n ukuna u maci u ḁa u woko tsu yavu burundu n marāga ma tsa ciga adama a kuvon. <sup>8</sup> Kashilā ka tsa gbashika ama a ka ṅakasa tsu baci karinga, ko a goruso tsu baci. Kashilā ka tsa gbashika ama a ka cikpala tsu baci, ko a ka ṅakasa tsu baci a'ala a cingi. Ama a bidya tsu tā aza a kaḁan, shegai kain dem ukuna u mayun u ḁa tsa dansa. <sup>9</sup> Ya dem reve tsu tā, shegai a gonoi a ka yanka tsu yavu a reve tsu wa. Tsa rongu yavu ukpā wā evu, shegai aṅtsa na, hal n gogo-na tsā tā n uma. Tsu pana tā ikyamba cika, shegai a wuna tsu wa. <sup>10</sup> Kain dem tsu tsu rongu tā n mazanga, ko a asuvu a a'ayin a upana u ikyamba. Aza a unambi a ḁa tsari, shegai tsu zuwai ama ushani a yain utsari a asuvu a upityanangu. Tsā n ili wa, shegai mayun ḁa wari an tsari n ko ndya wa.

<sup>11</sup> Edā aza a Korintiya, tsu dansa tā n aḁa karara. Atakasuvu a tsunu a shadangu tā n uciga u ḁe. <sup>12</sup> Tsu asaka ḁa uciga wa, shegai edā i asaka tsu tā uciga. <sup>13</sup> Ma dansa tā n aḁa tyoku ḁa ma dansa na mmuku n wā. Wenike tsu uciga tyoku ḁa aṅtsu tsu wenike ḁa.

### *Kuwa ku Kashilā ka uma*

<sup>14</sup> Kotsu i yain manyan kaḁolo a asu u te n aza ḁa bawu a wushuki n Kawauwi wa. Ukuna u shinga n u cingi wa rongu kaḁolo wa. Katyashi n

karimbi a ka rongo kaɓolo a asu u te wa. <sup>15</sup> Nida Kawauwi n Kanangasi\* a ka walamgbana? Nida uza ɗa wushuki n Kawauwi wa walamgbana n uza ɗa bawu u wushuki? <sup>16</sup> Kuwa ku Kashila ka walamgbana n ameli wa, ko kenu. Kpam ɗa kuwa ku Kashila Uza u Uma. Kashila ka dana ta, “Ma dusuku ta n ele aku n zuwa kuwa ku va a asu u ɗa a'ari. Ma woko ta Kashila ka le, ele kpam a ka woko ta ama a va.” ◇

<sup>17</sup> Adama a nala, Magono ma Zuba ma dana ta, “Wutai a asuvu a le i peci kaci de n ele. Kotsu i sawa ili i'ya Mele ma danai i'a n ashinda wa, tsara n wushi da.” ◇

<sup>18</sup> Magono ma Zuba, Uza u Ucira Gba u dana ta, “Ma woko ta Tata u de, eda kpam ya woko ta mmuku n va.” ◇

## 7

<sup>1</sup> Aje a va, Kashila ka ka yansa ka tsu kazuwamgbani ka na ki. Adama a nala tsu sumai ili i'ya ya zuwa tsu nangasa ikyamba n a'ulu a tsunu n icadi. Tsu nakai Kashila tsupige, aku tsu matsai tsu yain gba i'ya tsa yan tsu woko tyoku u ne dere.

### *Ipeli i'ya Bulus wari n i'ya*

<sup>2</sup> Kukpunka tsu atakasuvu a de! Tsu nusuka ko uza wa. Tsu nangasa kpam upityanangu u uza wa. Tsu ryafa ko uza wa. <sup>3</sup> Dana da n danai nala an ma ciga n zuwuka da unyushi wa. Mari n tonuko da ta caupa an tsu tsu rongo da ucibusu, ko ndya

\* **6:15** Kanangasi; wata, “Shetan” kala ka dem ka Kalapansi.

◇ **6:16** Adkp. 26:12; Izk. 37:27. ◇ **6:17** Isha. 52:11; Izk. 20:34.

◇ **6:18** 2 Sam. 7:14.



baci tani ya gita. <sup>4</sup> N wushuku ta n ada gba gba. Kain dem n tsu rongo ta n mazanga adama a de. I gbamatangu mu katakasuvu. Ko an u wokoi mari ushadangi n kadambula, i zuwa mu ta ma pana kayanyan.

<sup>5</sup> An tsu rawai a uyamba u Masidaniya, tsu tsara uwunvuga wa. Tsu cina ta kadambula ukyawin n atsu. Tsu shilakanasai n atokulalu, kpam tsa modono n uwonvo a atakasuvu a tsunu.

<sup>6</sup> Shegai Kashila ka ka tsu naka a aza da a'ari n kadambula ndishi ma atakasuvu, u naka tsu ta ndishi ma atakasuvu a'ayin a da Taitu tuwai ara tsunu. <sup>7</sup> Mayun tsu pana ta kayanyan an tsu gawunsai n Taitu, shegai gba ili i'ya i zuwai tsu panai kayanyan cika i'ya an i gbamatangu yi katakasuvu. U tonuko tsu ta an ya ciga mu uwene kpam hal ukuna u bala da n ukuna u da i yain. U tonuko mu ta tyoku da i matsai i da ya ciga i banga mu. An n panai nala, n pana ta kayanyan cika.

<sup>8</sup> Ko ukanikorongi u va u nangasa da baci katsuma, ukuna u bala mu an n korongi u da wa. A kagita ukuna wa bala mu ta an u nangasa da katsuma, shegai unamgbukatsuma u de u barakpa wa.

<sup>9</sup> Gogo-na kpam ma ta n mazanga. Mazanga ma ma yan an n nangasa da katsuma wa, shegai unamgbukatsuma u de u zuwa da ta i savadai ahali a de. Adama a nala tsu shitangu da wa, ko kenu.

<sup>10</sup> Kpaci Kashila ka fuda ta ka yan manyan n unamgbukatsuma u tsunu u banga tsu tsu kpatala tsu asaka unyushi u cingi tsu tsara iwauwi. Ukuna wa bala tsu n unamgbukatsuma u nala vi wa. Shegai unamgbukatsuma vi a kaci ka ukuna u likimba u da baci, wa tuko ta ukpa.

<sup>11</sup> Zuwai a'eshi a asu u unambukatsuma u nala vi u da Kashila ka ciga da i pana u yain a asuvu a de. U zuwa da ta i gonuko ugboji. U zuwa da ta ya ciga i wenike an bawu i'ari n unyushi. U zuwa da ta upan n uwonvo. U zuwa da ta ya ciga i wene mu. U zuwa da ta i matsa i banga aza roku. U zuwa da ta uciga u uyan uza da nusai mavura dere. Ukuna u nala u zuwa da ta i wenike kaci ka de kabirya da wa. <sup>12</sup> Korongu da n korongi ukanikorongi u na vi tsara i wene, a kapala ka Kashila, tyoku da i'ari ufobusi i panaka tsu. Korongu da n korongi adama a uza da nusai wa, ko adama a uza da a nusukai wa. <sup>13</sup> Ili i'ya gai i zuwai tsu gbamai asuvu i'ya gai la vi.

Ko an u wokoi tsari n ugbami u asuvu, tsu la ta upana kayanyan an Taitu wari dem n upana kayanyan, kpaci i wenike ta an bawu wari n ili i'ya ya balayi. <sup>14</sup> Tsu tonuko yi ta tyoku da tsu panai kayanyan adama a de, kpam i wenikei an n yain dere. Gba i'ya tsu tonuko da vi mayun da, kpam i wenikei Taitu ili i'ya tsu danai a kaci ka de ki mayun da. <sup>15</sup> Pini nala, uciga u ne ubana ara de u lya ta kelime n ugbonguro, a'ayin a da baci u cibai tyoku da gba de i panakai udani u ne, n tyoku da i wusha yi n uwonvo n uje u ikyamba. <sup>16</sup> Ma ta n mazanga an ma fuda ma wushuku n ada gba gba.

## 8

### *Atoni a naka kune yaa*

<sup>1</sup> Aje a va, tsa ciga ta i reve tyoku da Kashila ka wenikei ukuna u shinga u ne a a'uwa a Atoni a uyamba u Masidaniya. <sup>2</sup> A pana ta ikyamba kpam n unambi cika, shegai mazanga ma le ma kotso

wa, kpam a naka ta ili i'ya i lai i'ya a ka ciga le a naka. <sup>3</sup> Asaka gai n tonuko da, a naka ta tyoku da a ka fuda hal gbam u lai ushani. Ko uza u tonuko le a yain nala wa. <sup>4</sup> Shegai a rongo tsu ufolo tsu asaka le dem a banga ama a Kashila aza da a'ari a Urishelima. <sup>5</sup> Tsu yawunsa gbam a ka fuda a ka naka nala wa! A gita ta a nakai kaci ka le a asu u Asheku, aku ara tsunu. Ili i'ya Kashila ka ciga i'ya la vi. <sup>6</sup> Taitu da gita da uwenishike unaka, adama a nala tsu folo yi u doku u gono ara de u banga da tsara i koruso ili i'ya i gitai vi. <sup>7</sup> I yan ta ko ndya wa mai hal gbam i pasakai cika: I'a ta n upityanangu kpam i'a ta uyan u kadyanshi ka shinga. I'a ta dem n ureve, kain dem ya ciga i banga, kpam ya ciga tsu cika. Adama a nala, tsa ciga da ta i yain ukuna u shinga vi mai a asu u unaka yaa.

<sup>8</sup> Shegai dana da n danai she i naka ko bawu ya ciga wa, ko an u wokoi a'uwa a Atoni a roku a ka ciga ta a yain nala. Ure u roku u da dem u da ya wenike uciga u maci. <sup>9</sup> I reve ta ukuna u shinga u Yesu Kawauwi Asheku, i reve ta an Kawauwi kari n utsari, shegai adama a de u woko ta uza u unambi, tsara adama a unambi u ne eda i tsara utsari.

<sup>10</sup> Adooki a va a da na: Nabalun eda aza a kagita aza da i cigai i naka, kpam eda aza a kagita a da i nakai vi. <sup>11</sup> Gogo-na, ma ciga ta i koruso manyan ma i gitai uyan vi. Wenikei an ya fuda ya koruso manyan mi n maloko tyoku da i gitai ma. Nakai a asuvu a ili i'ya i'ari n i'ya. <sup>12</sup> Ya ciga baci i naka, wa yan n kalen ko ndya i nakai wa, kpaci Kashila ka la ta uciga i naka a asuvu a ili i'ya i'ari n i'ya, shegai i naka ili i'ya bawu i'ari n i'ya wa.

<sup>13</sup> Ma ciga i naka ili ushani hal i woko bawu ili, aku i rongo a upana ikyamba an bawu i'ari n ili wa. Ma ciga ta uza da baci dem wari pini u zuwa kukere dere. <sup>14</sup> Gogo-na naha, i'a ta n ili ushani. Ili i'ya i'ari n i'ya ya fuda ta ya banga aza da bawu a'ari n ili. Aku ubana a kapala a tuwa baci a tsarai, aku a banga da dem a'ayin a da baci bawu i'ari n i'ya, pini nala, she i woko una u te. <sup>15</sup> Tagarada u Kashila u dana ta, "Uza da baci bolongi ili ushani, i tsu pasa ili i'ya wa ciga wa, shegai uza da baci bolongi kenu, wa namba ili wa." ◇

### *Taitu n aje a ne*

<sup>16</sup> N cikpa ta Kashila an u zuwai Taitu wa ciga da tyoku da ma ciga da. <sup>17</sup> Taitu wushuku ta u yain ili i'ya tsu tonuko yi u yain. Wa ta n maluwa cika ma wa ciga u tuwa ara de, tun bawu tsu tonuko yi gbam nala. <sup>18</sup> Aya la tsa suku kabolo n utoku uza da wari Katoni, uza da kpam gba Atoni a ka cikpala adama a manyan ma ne a asu u uyan ku'ari ku Kadyanshi ka Shinga. <sup>19</sup> Atoni yi a dangasa yi ta dem u bana kabolo n atsu tsa naka baci kune ku na ki. Yan da tsa yan manyan ma na mi tsara tsu naka Asheku tsupige, kpam tsu wenike an tsa ciga tsu banga cika.

<sup>20</sup> Kpaci tsa ciga ko uza u kana tsu n unyushi u tyoku da tsu nakai kune ku pige ku na ki wa. <sup>21</sup> Shegai tsa ciga ta tsu yain ili i'ya Asheku a ka pana kayanyan n ili i'ya i'ari dere a a'eshi a ama.

<sup>22</sup> Tsa suku ta dem vuma roku kabolo n ama a re a nala yi. Kain dem vuma na wa ta ufo'busi adama a ubanga. U wenike tsu ta nala a ure kau-kau,

---

◇ 8:15 Uwt. 16:18.

kpam gogo-na dem wa la ta uciga ubanga. Kpaci u wushuku ta n ada cika. <sup>23</sup> Uza roku u wecike baci Taitu, i dana utoku u va u da uza da wa yan manyan na mpa tsara u banga da. A'uwa a Atoni a suku ta ama a na yi ara de, kpam a tuko ta tsupige a asu u Kawauwi. <sup>24</sup> Wenike le uciga, tsara gba a'uwa a Atoni a reve an tsu yain dere a asu u mazanga n i'ya tsu yain adama a de.

## 9

### *Kune adama a aza a unambi*

<sup>1</sup> N wene ili i'ya ya zuwa mu n koronku da adama a kune ka i fobusoi ya naka ama a Kashila yi wa. <sup>2</sup> N reve ta banga da ya ciga i banga. Ma ta n mazanga adama a nala yi, kpam ma ta a utonusuko ama a asuvu a Masidaniya n da eda Atoni a da i'ari a Akataya, i fobuso ta tun nabalun tsara i naka. Adama a umatsa u da i matsai ya ciga i naka vi, u zuwa ta aza roku aza a Masidaniya a ka ciga dem a naka. <sup>3</sup> Shegai mpa pini ma sukunku da atoku a nala yi tsara kadyanshi ka tsunu a kaci ka de ka woko ka gbanu wa. Ma ciga ta i fobuso, kpaci n tonuko le ta i fobuso de. <sup>4</sup> Ma pana ta uwono, eda kpam dem ya pana ta uwono, mpa n Atoni a roku a Masidaniya tsu tuwa baci tsu cina da bawu afobi, cina n tonuko le tani de i fobuso de! <sup>5</sup> Da n wenei yavu wa gan ta n suku atoku a nala yi a kapala ka va a wene kune ka i yain kazuwamgbani ki i fobuso ta ka. Nala wa wenike ta an n ucigi u de u da i nakai, shegai mpa n matsa da wa.

<sup>6</sup> Ma ciga ta i reve, uza u ce baci ili kenu, ili kenu i'ya wa kapa. Uza da baci kpam u cei ili ushani, wa kapa ta ili ushani. <sup>7</sup> Adama a nala ya

dem u yawunsa tyoku u kakuma ka ili i'ya wa naka. Kotsu vu naka ili wa, ikyamba i vunu i 'yanga baci vu naka wa. Kotsu vu naka ili wa, va wene baci yavu matsa da a ka matsa vu vu naka. Kpaci Kashila ka la ta uciga uza da u nakai n ipeli.

<sup>8</sup> Kashila kpam ka zuwuka da ta una u shinga u da u lai ili i'ya i nambai. Pini nala, da kain dem ya yan n ili ushani, kpam i yain n i'ya kaberekete hal i nakasa adama a manyan ma shinga gba.

<sup>9</sup> Tagarada u Kashila u dana ta:

“Gbani da vuma u maci u tsu naka aza a unambi kune,  
kpam ukuna u maci u ne wa ta pini bawu utyoku.”

◇

<sup>10</sup> Kpaci Kashila ka ka tsu naka kacimbi icun, u naka kpam ilikulya. Wa doku ta ili i'ya i'ari n i'ya kakuma, tsara i tsara i'ya ya naka ushani a asu u uyan ukuna u shinga. <sup>11</sup> Wa kukpa ta ure kau-kau u da wa zuwa da i yain utsari tsara i yansa kune yaa. Pini nala, da ama ushani a ka cikpa Kashila a'ayin da baci tsu naka le kune ku de.

<sup>12</sup> Pini nala, ili i shinga i re ya gita ta, ili i'ya ama a Kashila a nambai a ka tsara ta i'ya, ama a ka cikpa ta kpam Kashila n mazanga. <sup>13</sup> Ya rongo ta a unaka Kashila tsupige kpaci i naka ta yaa. I wushuku ta n akani a kaci ka Kawauwi, kpam i panaka ta a da an i nakai Atoni a Urishelima yaa hal n Atoni a da a buwai. <sup>14</sup> Gogo-na alya pini a ka yanka da kvasu, kpam a ka ciga da uwene, adama a ukuna u shinga u pige u da Kashila ka yanka da. <sup>15</sup> Asakai tsu cikpai Kashila adama a kune ka u naka tsu gbani.

---

◇ 9:9 Ishp. 112:9.

# 10

## *Bulus yain kadyanshi ka manyan ma ne*

<sup>1</sup> Mpa Bulus uza da wa folo da vi, kpm n matanu n tsishinga tsu Kawauwi tsa ma folo da. Aza roku a dana ta, a'ayin a da baci mari kaɓolo n ada n tsu gajarakpa ikyamba wa, aku n rongo n asuvu a shen a'ayin a da baci bawu mari evu n ada. <sup>2</sup> A'ayin a da n doku n tuwa da ukondo, u kana ta n yanka aza da a ka wundya tsa tono ta ukuna u likimba asuvu a shen. Ma ciga i zuwa mu n yanka da nala wa. <sup>3</sup> A likimba da tsari, shegai kushulu ku tsunu unu u te da kari n tyoku da aza likimba a ka yansa wa. <sup>4</sup> Tsu tsu shilakana n iwunukatsu icun i'ya aza a likimba a tsu shilakanaka wa. Iwunukatsu i tsunu i'a ta n ucira u da u wutai a asu u Kashila u da wa wacinsa ucira u asu kau-kau u utokulalu. <sup>5</sup> Tsu tsu wacinsa ta kananamgbani n gba icun i aradi a da a ka bishinka uza ureve Kashila. Tsu tsu kana ta uyawunsa u gbani u ama, aku tsu zuwa le a panaKa Kawauwi. <sup>6</sup> A'ayin a da baci i wenikei ya panaKa de Kawauwi gba gba, pini nala, aku tsu rongo ufobusi adama a da tsa yanka aza da bawu a ka panaKa Kawauwi mavura.

<sup>7</sup> Gogo-na ili i'ya ya wene n a'eshi koshi i'ya ya wundya. Shegai u gan ta i ciba an tsari aza a Kawauwi tyoku da dem aza a aradi a nala a tsu dana ele aza a Kawauwi a da a'ari. <sup>8</sup> Mayun da wari an tsu tsu dansa n agoni a kaci ka ucira u da Asheku a naka tsu tsara tsu banga da, shegai adama a da tsa varangu da wa. N tsu pana uwono adama a ukuna u nala wa. <sup>9</sup> A'ayin a da n koronku da vi, ma ciga i yawunsa yavu uwonvo u da ma ciga n zuwa da i pana wa. <sup>10</sup> Aza roku a da,

“Ikanikorongi i Bulus i'a t̄a n ucira kpm n kalen cika, shegai w̄a baci kabolo n ātsu, u tsu yan n ucira wa. Kpm kadyanshi ka ne ka tsu yan n kalen wa.” <sup>11</sup> Ma ciga t̄a a reve ukuna u roku: Gogo-na naha ts̄a kabolo n ād̄a wa, d̄a i zuwai tsu korongi ukuna u na vi a ikanikorongi. Shegai a'ayin a d̄a baci ts̄ari kabolo n ād̄a, tsa wenike t̄a ucira vi tyoku d̄a tsu wenikei u d̄a a ikanikorongi yi.

<sup>12</sup> Tsa kawan tsu bidya kaci ka tsunu un̄a u te n aza d̄a a tsu yawunsa kaci ka le a'ā t̄a n kalen wa. A tsu boluko t̄a kaci ka le ure u ur̄atsan̄aka aku a ratsan̄aka kaci ka le n u d̄a. A tsu gawuntangu t̄a kaci ka le n ko ndya wa tyoku d̄a ele a'ari. Nala wa wenike t̄a an bawu a revei ili. <sup>13</sup> Shegai ātsu tsa yan ar̄adi a kaci ka ili i'ya i'ari a kateshe n manyan ma Kashil̄a ka n̄aka tsu tsu yain wa. Ar̄adi a d̄a koshi tsa yan a d̄a a manyan ma Kashil̄a ka suku tsu tsu yain, kpm ed̄a dem i'a t̄a a asuvu a manyan ma nala mi. <sup>14</sup> Ar̄adi yi a wura tyoku d̄a u gain tsu yain a d̄a wa, ātsa gb̄am aza a kagita aza d̄a a tuko d̄a Kadyanshi ka Shinga ka Kawauwi. <sup>15</sup> Tsu tsu yan ar̄adi adama a ili i'ya aza roku a yain i woko yavu ātsa tsu yain i'ya wa. Shegai tsu zuwa t̄a uma upityanangu u d̄e wa gbama t̄a hal u zuwa manyan ma tsunu ara d̄e ma lyai kelime cika. <sup>16</sup> Tsa ciga t̄a tsu ba tsu yain Kadyanshi ka Shinga ki a asu u m̄bari m̄bari. Tsa ciga tsu yain ar̄adi n manyan ma aza roku a yain a asu u le wa. <sup>17</sup> Tagar̄ada u Kashil̄a dana t̄a, “Va ciga baci vu yain ar̄adi, she vu yain a d̄a a ili i'ya Asheku a yain.”  
 ◇ <sup>18</sup> A kaci ka uza d̄a wa cikpal̄asa kaci ka ne kpm,

---

◇ 10:17 Iri. 9:24.



u tsu tsarā icikpali wa. Shegai Magono ma Zuba ma wushunku baci uza, vuma nala vi aya wa tsarā icikpali i mayun.

## 11

### *Bulus n asuki a kaβan*

<sup>1</sup> Ma ciga tā i yanka mu ahankuri a'ayin a da baci n yain maku ma utengeshi. Mayun n folo dā tā i yanka mu ahankuri. <sup>2</sup> Ma kirana tā n aḍa cika tyoku da Kashila ka kirana n aḍa. I'a tā tyoku u maku ma uka ma bawu ma revei vali, uza da a yankai kazuwamgbani ka iyolo i vali u te koshi; wata, Kawauwi ka la vi n kaci ka ne. <sup>3</sup> Shegai gogo-na ma pana tā uwonvo u da a ka puwunsa atakasuvu a de tsarā i asaka utono Kawauwi mayun mayun n uwulukpi, tyoku da kali ka yinsa Hawa† n ugboji u cingi u ne. <sup>4</sup> Tsu tonuko dā tā ukuna u Yesu, kpam i wushai Kulu Keri, i wushuki kpam n akani a tsunu. Shegai i asakai aza roku a tonuko dā ukuna u roku kau n u Yesu. Gogo-na ufoḅusi u da i'ari i wushi kulu ku roku de kau, i wushi kpam akani a roku. <sup>5</sup> N wene aza da a ka isa kaci ka le “asuki a pige” a la mu wa. <sup>6</sup> Gaawan n tsu dansa karkar tyoku u le wa, shegai n reve tā ili i'ya ma dansa. Tsu yan tā gba i'ya tsa yan tsu wenike dā ili i na yi mai. <sup>7</sup> N zuwa dā i tsupa mu adama a Kadyanshi ka Shinga ka n yanka dā kuβari wa. N gonuko tā kaci ka va kenu, aku n naka dā tsupige. An n yain nala vi, n nusa? <sup>8</sup> An a'uwa a Atoni a roku a ka nakasa mu ikebe, u woko tā yavu bokuso da ma bokuso ikebe yi tsarā n gbashika dā. <sup>9</sup> N namba baci ili a'ayin a da mari n aḍa, n tsu tonuko dā i βanga mu wa. Atoku a

ɗa a wutaɪ a Masidaniya a tuwaɪ pini na, a naƙa mu ta gba ili i'ya ma ciga. N taɓa ɗa ufolo i ɓaŋga mu wa, kpam ma folo ɗa wa. <sup>10</sup> Ko uza wa la a asuvu a uyamba u Akataya uza ɗa wa bihinka mu uyansa kadyanshi a kaci ka ili i nala wa. N dana ta kpam nala adama a ukuna u mayun u Kawauwi u ɗa wari a asuvu a va. <sup>11</sup> N dana baci ma ciga n zuwuka ɗa araji wa, u woko yavu ma ciga ɗa wa? Nala wa. Ko Kashila ka reve ta ma ciga ɗa.

<sup>12</sup> Kpam ma lya ta kelime n uyan ili i'ya ma yan gogo-na vi, kpaci ma ciga ta n bihinka ama a nala utsara u ili i'ya a ka yanka aradi. A ciga ta a dana manyan ma a ka yanka aradi yi ma ta unu te n ma tsunu. <sup>13</sup> Ama a na yi asuki a kaɓan a ɗa. Manyan ma le ma a tsu yanka kaɓan, aku a gonukoi kaci ka le tsara a rotso asuki a mayun a Kawauwi. <sup>14</sup> Shegai mpa n yan majiyan ma ili i nala wa! Ko Kanangasi\* ka gonuko ta kaci ka ne tsara u rotso katsumate ka zuba† ka katyashi. <sup>15</sup> Adama a nala, tsu yan majiyan an agbashi a Kanangasi a gonukoi kaci ka le a rotso agbashi a ɗa a ka yan manyan ma ukuna u shinga wa. Shegai a makorishi a ka tsara ta mavura dere n ili i'ya a yain.

### *Upana u ikyamba u Bulus*

<sup>16</sup> Asaka n doku n tonuko ɗa: Ko uza kotsu u wundi yavu mpa katengeshi ka wa. Shegai nala baci ya wundya, she i panaka mu tyoku ɗa ya panaka katengeshi, mpa dem aku n yain aradi kenu. <sup>17</sup> A'ayin a ɗa baci ma cikpala kaci ka va nala, tyoku u Asheku u ɗa n tsu dansa wa, shegai

---

\* **11:14** Kanangasi; wata, “Shetan” kala ka dem ka Kalapansi.

tyoku u katengeshi. <sup>18</sup> Ama ushani a ka yan ta aradi a kaci ka ili i'ya a yain a likimba. Adama a nala mpa dem ma yan ta aradi. <sup>19</sup> Eda aza da ya wundya yavu i'a n ugboji, i tsu pana ta kayanyan ka upana kadyanshi ka atengeshi. <sup>20</sup> I tsu yan ta gbam ahankuri n aza da a tsu gonuko da agbashi a le, ko a ryafusa da, n aza da a tsu yinsasa da. I tsu yan ta dem ahankuri n aza da a tsu wundya yavu a la da, ko aza da a tsu basasa da. <sup>21</sup> N tsu pana ta uwono n dana tsan n ucira u da tsa yan nala wa.

A ka yan baci aradi, mpa dem ma yan ta, shegai utengeshi u da uyan nala vi. <sup>22</sup> A dana baci ele kagali ka Ibirahi ka, mpa dem uza u kagali ka Ibirahi ka. Ele aza a Isara'ila a da baci, mpa dem nala. Ele mmuku n tsikaya m Ibirahi n da baci, mpa dem nala. <sup>23</sup> Ele agbashi a Kawauwi a da baci, wa woko mu ta utengeshi n dansa baci nala. Shegai tyoku da ma gbashika yi u la ta tyoku da ele a ka gbashika yi. N yan ta manyan cika ma ma lai ma le. A zuwusa mu ta a kuwa ku a'ali hal u lai tyoku da a zuwusa le. Malapa ma a lapusa mu ma la ta ma a lapusai ele. N yansa ta evu n ukpa a'ayin ushani. <sup>24</sup> Aza a Yahuda a bawan mu ta n kaja6u hal kamankupa n kuci.† Kutawun ka gbam a bawan mu nala. <sup>25</sup> Aza a Roma a lapusa mu ta n alangu, kutatsu ka gbam a yanka mu nala. A ta6a mu ta uvarasa n atali tsara a wuna. N so ta nwalu a kpatsu, kpatsu ku tasan ta nan mpa hal kutatsu. N

---

† **11:24** A a'ayin a nala yi, a bawan baci vuma hal amangare, wa kuwa ta kpaci asoje yi a reve ta tyoku da a ka bawan vuma hal u kuwa ko kpam ukpada ukuwa. A bawan yi ta kamankupa n kuci a asaka yi a unan u kpa shegai wa kuwa wa.

taḅa ta urukpa a mini n kuvuli hal ubana kuvuli ku roku. <sup>26</sup> Nwalu n kakuma mi, n tsu zuwa mu ta n yain evu n ukpa adama a uwaya u mini n adama a aza a magalaka. N yan ta evu n ukpa adama a ama a va, aza a Yahuda, kpam hal n Awulawa. N tsu yan ta evu n ukpa a ilyuci ilyuci, n a kakamba, hal n mala dem. N yan ta dem evu n ukpa adama a aza da a danai ele Atoni a da, shegai Atoni a da wa. <sup>27</sup> N yan ta manyan cika hal n togbolukoi, a'ayin ushani n tsu lavuta gbam wa. N tsu ronguso ta n kambulu n kakuli, kpam a'ayin ushani n tsu tsara ilikulya wa. N soso ta kutanu kpaci ma n aminya a u'uka cika wa. <sup>28</sup> Hal n ara gai, kain dem u tsu woko ta yavu va da n canga ta ucanga u araji kpaci n tsu balata asuvu adama a a'uwa a Atoni. <sup>29</sup> A'ayin a da baci bawu aza roku a'ari n ucira, n tsu woko ta dem bawu ucira. Asuvu a tsu sufugba mu ta a'ayin a da baci n wenei a yinsai uza roku tsara u yain unyushi.

<sup>30</sup> U kana baci n cikpala kaci ka va, ma yan ta nala adama a ili i'ya i zuwa mu n woko bawu ucira.

<sup>31</sup> Kashila ka reve ta kaban ka ma yan wa. Aya Kashila n Tata u Yesu Kawauwi Asheku, uza da a ka cikpala hal ubana bawu utyoku. <sup>32</sup> An mari a Damasuka, uza da wari gomuna a'ayin a da Arita wa lya tsugono, wari u ciga ta u kana mu, adama a nala, u zuwa ta aza a uwundya ukyawan a ilyuci yi. <sup>33</sup> Shegai aje a va a zuralakpa mu a asuvu a mabana a ilinuku i kasaga ka ilyuci ki. Tyoku da n lai a akere a gomuna yi da la vi.

*Asheku a wenikei Bulus kuwene*

<sup>1</sup> U kaṅaṅa ta n yain araḍi, ko an u wokoi ko kalen ma lya pini wa, shegai asaḳa n yain a da adama a kuwene n ili i'ya Asheku a wenike mu. <sup>2</sup> Ayen kupa n a nishi a da a wurai, Kashila ka wusha ta Katoni ka Kawauwi ka roku a asu u uwunvugusa a zuba u Kashila a'ayin a roku. N reve wa, ko ikyamba i ne i'ya i walai, ko kpam kulu ku ne, shegai Kashila ka reve ta. <sup>3-4</sup> N doku n dana, n reve ta a bidya ta vuma u na ubana a asu u uwunvugusa a zuba. Shegai ko ikyamba i ne i'ya i banai a zuba vi ko kulu ku ne ka koshi ku banai n reve wa, Kashila ka ka revei. U pana ta kadyanshi ka roku ka bawu wa fuda wa todugbo, n ili i'ya bawu Kashila ka asaḳa uza dana. <sup>5</sup> Adama a nala ma yan ta araḍi adama a vuma na vi, shegai ma yan a da adama a kaci ka va wa, she ili i'ya ya zuwa mu n reve an bawu mari n ucira. <sup>6</sup> Mari ma ciga baci n yanka kaci ka va araḍi, wa woko mu utengeshi wa, kpaci mari ma dansa ta ukuna u mayun. Ma yan a da adama a kaci ka va wa. Ma ciga ama a naka mu tsupige tsa tsu lai tsu ili i'ya a wenei ma yan ko n danai wa.

<sup>7</sup> U gan n woko n araḍi a kaci ka ili i pige i pige i'ya Kashila ka wenike mu wa. Da gai i zuwai u naka mu mballa n pana ikyamba yi, tyoku da kawana ka tsu sapa ikyamba. U woko yavu katsumate ka Kanangasi\* ka ka zuwa mu n pana ikyamba, u bishinka mu kpam uyan araḍi. <sup>8</sup> N folo ta Asheku hal kutatsu tsara u takpa mu ukuna u na vi. <sup>9</sup> Shegai u tonuko mu, “Ukuna u shinga

---

\* **12:7** Kanangasi; wata, “Shetan” kala ka dem ka Kalapansi.

u va u rawa vu ta. A'ayin a da baci bawu vari n ucira, ucira u va u tsu shadangu ta ara vunu.” Adama a nala, gogo-na ma ta n mazanga ma ma yan aradi adama a da bawu mari n ucira, ucira u Kawauwi u yain manyan ara va. <sup>10</sup> Adama a da wa woko ukuna u shinga a asu u Kawauwi u da baci ma namba ucira, ko ama a ka tonusuko mu baci kagbani, ma yan ta mazanga. Ma namba baci ili adama a da wa woko ukuna u shinga a asu u Kawauwi, ko a ka yansa mu baci mavura, ma yan ta mazanga. A ka zuwusa mu baci n pana ikyamba adama a da Kawauwi ka tsara ukuna u shinga, ma yan ta mazanga. Kpam a'ayin a da baci dem n nambai ucira, a'ayin a nala a da ma tsara ucira cika.

*Bulus wa ciga ta aza a Korintiya*

<sup>11</sup> Tyoku u katengeshi u da ma dansa, shegai eda i zuwa mu ma dansa nala. Eda i gain ya dansa ukuna u maci a kaci ka va. Ko ma baci ili i roku wa, aza da a danai ele “asuki a pige” a da vi a la mu wa. <sup>12</sup> A'ayin a da mari kabolo n ada vi, n rongo ta n ahankuri kpam n yansa ta manyan ma ucira n iryoci n ili i'ya ya tuko ikunesavu i'ya i gain kasuki ka mayun ka yain. <sup>13</sup> Adama a nala, i wusha ta ili i'ya a'uwa a Atoni a da a buwai a wushai. Ili i te i'ya i takpanai: N gonuko kaci ka va n woko da kalandam wa. Yanka numu ahankuri!

<sup>14</sup> Mpa pini ma fobuso tsara n tuwa n kyawan da ukyawan u tatsu. Shegai hal n ara ma boluko da kalandam wa. Eda ma ciga, shegai ikebe i de wa. Mmuku n da n gain a fofo ikebe adama a ubidya araji a isheku i le wa, shegai isheku i bidya araji a mmuku n le. <sup>15</sup> Adama a nala, ma ta n mazanga

ma ma na<sub>ka</sub> ko ndya wa i va adama a de, hal gbam n kaci ka va dem. Ya jebe uciga u da ya ciga mu vi an u wokoi n la da uciga?

<sup>16</sup> Aza roku a de a wushuku ta an bawu n woko da kaladam. Shegai, hal n gogo-na alya pini a ka yawunsa yavu ugboji u da n yain n yanka da kaban tsara n wanda da. <sup>17</sup> Ama da n sukunku da vi, uza roku wa pini uza da ryafa da? <sup>18</sup> N folo ta Taitu tuwa ara de, kpam n tutsuku yi ta kabolo n Katoni ka roku. Shegai u ryafa da wa. Eda dem n kaci ka de i reve ta an mpa n eyi ko ndya wa una u te u da i'ari tsu, kpam uyawunsa u da tsu u te.

<sup>19</sup> Gaawan ya dana ta dana da tsu danai gba nala tsara tsu wenike an tsari ama a maci. Nala wa. Tsu tsu dansa ta tyoku da Kawauwi ka ciga tsu tsu dansa a kapala ka Kashila. Eda aje a tsunu a da, kpam ko ndya baci tsa yan, yan da tsa yan i'ya tsara tsu zuwa da i gbama. <sup>20</sup> Kpaci ma pana ta uwonvo u da n tuwa da baci ukyawan, ahali a de a kpada mu uyankpa, kpam adama a nala, ahali a va dem a ka yankpa da wa. Ma pana ta uwonvo u da ma cina da n i nanamgbani, ko n i yanyi malyon ma ili i'ya ama a'ari n i'ya. Ma pana ta uwonvo u da ma cina da n asuvu a shen, ko kpam ya cigaka kaci ka de ko ndya wa. Ma pana ta dem uwonvo u da ma cina da n i tonusuki ama kagbani, ko n i yanyi ndyami. Kotsu kpam gai n cina da n i yanyi aradi, ko ya rongo kabarikete bawu i kana i kaci wa. <sup>21</sup> Mayun da ma pana uwonvo u da n tuwa baci gaawan Kashila ka va ka gonuko mu ta kenu adama a de. Kpam ma sa ta adama a aza da a'ari a ka yansa unyushi u cingi bawu a kpatalai a asakai ukuna u ashinda u le, n tsishankala, n ukuna u

uwono.

## 13

### *Bulus kotsoi unakā adooki a ne*

<sup>1</sup> Ma tuwā tā ara dē utuwā u tatsu. Tagarāda u Kashilā da, “U k̄anā tā ama a re ko ama a tatsu a reve n ukuna u dā a k̄anai vuma n u dā mayun dā.” ◇ <sup>2</sup> An n doki n tuwāi ara dē utuwā u ire, n rono tā aza dā a ka yansa unyushi u cingi atsuvu. Gogo-na dem an bawu m̄ari evu n aḍa, ma doku tā ma dana u dā: A'ayin a dā baci n doku n tuwāi ara dē, ko uza wa la a asuvu a mavura wa. <sup>3</sup> Ma wenike dā tā an mayun dā Kawauwi ka dansa a unā u vā. An wa yansa manyan ara dē, u yansa ma bawu ucira wa, shegai wā tā n ucira. <sup>4</sup> Mayun dā u rongoi bawu ucira a'ayin a dā a wandamgbana yi, shegai gogo-na n ucira u Kashilā u dā wa rongo. Ātsu dem tsā n ucira wa, tyoku dā Kawauwi ka rongoi a mawandamgbani. Shegai ya wene tā an tsa tuwā tsu rongo n ucira u Kashilā, tyoku dā Kawauwi ka rongo.

<sup>5</sup> Vecei kaci ka dē mai, i kondo kaci ka dē i wene ko i'ā pini ukani n i'ya i wushuki vi. I lya baci ukondo vi, ya reve tā an Yesu Kawauwi w̄ari a asuvu a dē. I reve baci an Yesu w̄ari a asuvu a dē wa, i rukpā dē ukondo vi. <sup>6</sup> Ma zuwa tā uma i wene an bawu ātsu tsu rukpāi ukondo vi. <sup>7</sup> Tsu yan tā kavasubana a asu u Kashilā kotsu i yain ili i cingi wa. Yan dā tsa yan kavasubana nala tsarā ama a wene an tsari mai wa, shegai tsarā u zuwa dā i yain ili i'ya i'ari mai, ko u woko baci yavu ātsu tsu rukpā ukondo vi. <sup>8</sup> Ili i'ya koshi tsa yan i'ya, i'ya ya zuwa

---

◇ 13:1 U.Ml. 19:15.



tsu tsu tutsuku ukuna u maci kelime. Tsa yan ili i'ya ya kangu u da wa. <sup>9</sup> Ko an u wokoi bawu tsari n ucira, tsa ta n mazanga an eda i'ari n ucira. Tsa yan ta kvasu adama a da ya lapula i woko mai. <sup>10</sup> Koronku da ma koronku da ili i na yi kahu n rawa la. Yan da n yain nala tsara n tuwa baci, ili i'a la i'ya ya zuwa mu n barana da n ucira wa ma dansa baci n ada n ucira u da Asheku a naka mu. U naka mu ucira vi adama a da ma varangu da wa, shegai adama a da ma banga da.

### *Idyani i makorishi*

<sup>11</sup> Gogo-na ama a va, ma kotso de ukanikorongi u na vi. N tonuko da ta: Yanyi mazanga! Sava dai ahali a de. Kiranai n i'ya n tonuko da. Rongoi n katakasuvu ka te n ko ya wa. I rongo kaɓolo na ndishi n shinga. Pini nala, Kashila ka uciga n ka ndishi n shinga ka rongo ta n ada.

<sup>12</sup> Damamgbanasai a asuvu a uciga u Atoni.

<sup>13</sup> Gba Atoni a da a'ari pini na a ka sukunku da ta idyani i le.

<sup>14</sup> Asaka ukuna u shinga u Yesu Kawauwi Asheku, n uciga u Kashila, na ndishi n kaɓolo n Kulu Keri a rongo n ada gba.

**Kazuwamgbani ka savu n Tsikimba n a6on a  
da a dangasai a kazuwamgbani ka cau  
New Testament in Tsikimba (NI:kdl:Tsikimba)**

copyright © 2010 Wycliffe Bible Translators, Inc.

Language: Tsikimba

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tsikimba

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022

a4f6a28b-3d6d-50b4-a81b-06ae05a66010